

## Era lèbe pauruga e era eruga que non s'arrupís

Aguesta ei era istòria d'ua lèbe tan pauruga, tan pauruga, que non li agradaue pas bric gèsser dera tuta, per páur de çò que se podesse trapar dehòra de casa.

Mès justament un dia qu'era lèbe pauruga ère gessuda a estirar es pautes e es aures, ua eruga, concrètament era eruga que dauant d'arren non s'arrupís, passèc peth dauant dera sua tuta e se didec ...

- Coma deu èster era tuta dera lèbe pauruga? ...

E en rossegar-se, rossegar-se, era eruga que dauant d'arren non s'arrupís s'i calèc entà hoishina'c e revira'c tot.

Quan era lèbe pauruga se n'encuedèc de qu'es èrbes de dauant dera sua tuta èren totes estornejades, s'espantèc e cridèc ena entrada dera tuta ...

- Ei! Qui s'a calat en casa mia?

E atau ei coma comencèc era istòria de: Era lèbe pauruga e era eruga que non s'arrupís

Era eruga se n'encuedèc qu'era votz dera lèbe retronie peth laguens dera tuta e pensèc que dilhèu poirie profiter aguest resson entà espantar era lèbe. E coma qu'era eruga dauant d'arren non s'arrupís, cridèc damb totes es sues fòrces ...

- Sò eth monstre guerrèr, eth hilh deth gigant mès fòrt deth món. D'ua bohada viri eth rinoceròs e damb un escopit deishi er elefant herit. Sò invencible. Ha, ha, ha, ha! Ha, ha, ha, ha!

Talament coma auie previst era eruga, era sua votz retronie de per tota era tuta e ère tan fòrta e tan grèu qu'era lèbe s'espantèc plan, e hugec entà demanar ajuda.

- Coma pogui hèr tèsta, prauba de jo, damb un monstre tan poderós?

Un tròç enlà se trapèc eth leon e li condèc eth problèma qu'auie.

- Amic leon, tu qu'ès tan fòrt e tan valent, se m'a calat un monstre ena tuta. Pòs ajudar-me tà hèr-lo gèsser?

E eth leon, qu'ère fòrça capinaut e li shautaue que li didessen qu'ère eth mès valent de toti, didec:

E tant que òc, non te'n hèsques. Sonque de flairar-me, aguest monstre de dus sòs horadadi hugerà qu'es cames li tocaràn en cuu.

Anèren de cap tara tuta dera lèbe e eth leon brulhèc plan fòrt ... Dera tuta non gessec cap de son. Ère vertat que sonque de flairar eth leon eth monstre auie hujut? Quan eth leon ja se lecaue es pòts de content, entà pr'amor d'apuntar-se ua naua victòria, ua votz de tron gessec d'aqueth horat ...

- Atau m'agrade, que me pòrtes un bon leon entà vrespalhar. Sò eth monstre guerrèr, eth hilh deth gigant mès gròs deth món, e me pogui chapar tot un leon en un segon. Ha, ha, ha, ha!

En entèner açò, eth leon demorèc damb era boca dubèrta, es comes li comencèren a tremolar, era coa li tocaue en solèr e es dents li repompien es uns contra es autes com ua grapadora.

- Me sap grèu, lèbe, mès non pogui acarar-me damb un monstre tan poderós.

E hugec ath mès córrer, tant, que ne se le vedie passar.

Era lèbe, encara mès espantoriada en veir que ne eth leon non sajaue a hèr-li tèsta, tornèc a cercar ajuda e trapèc eth rinoceròs ...

- Rinoceròs, ajuda-me, que se m'a calat un monstre laguens dera tuta e non sai pas com hèr-lo a gésser.

Eth rinoceròs, acostumat que toti se hègen enlà sonque de entener-lo a arribar, non se hec pregar bric e acompanhèc era lèbe tara sua tuta. Es sòns passi hègen a tremolar tota era sèuva, mès quan arribèren ena tuta, tot demorèc en silenci ... E s'eth monstre auie hujut? ...

- Qui s'a calat ena tuta dera mia amiga era lèbe? -didec eth rinoceròs.

Mès era eruga auie trapat un lòc qu'encara retronie mès, atau que dera tuta gessec ua votz coma un tron.

- Sò eth monstre guerrèr, eth hilh deth gigant mès fòrt deth mon. D'ua bohada viri eth rinoceròs e damb un escopit dèishi er elefant herit. Sò invencible. Ha, ha, ha! Ha, ha, ha!

Eth rinoceròs s'espantèc tanplan.

- Me sap de grèu, amiga lèbe, mès s'aguest monstre me vire d'ua bohada, a jo que sò tan gròs e pesi tant, qui m'ajudarà a lheuar-me dempús?

Era lèbe ère desesperada. Sonque li mancaue demanar ajuda ar elefant. Eth ère er animau mès gròs e mès fòrt dera sèuva, sonque eth que poirie afrontar-se ath monstre que hège tremolar a toti damb era sua votz poderosa.

Mès er elefant, que ja auie entenut era istòria que corrie per tota era sèuva, qu'un monstre auie vençut eth leon e eth rinoceròs, sonque de sénter arribar era lèbe entà demanar-li ajuda se metec a tremolar e gessec ath mès córrer abantes qu'era lèbe podesse demanar-li arren.

Era lèbe, trista e plorosa, ja s'auie hèt era idèa d'abandonar era sua tuta e cercar-ne ua auta, per'mor qu'arrés non poirie trèir jamès d'aquiu laguens aqueth monstre. Enquia que se li apressèc era gargolha e li didec:

- Qué ei çò qu'as, lèbe?
- Ena mia tuta s'i a amagat un monstre e ne es animaus mès valents e mès fòrti dera sèuva non sagen de hèr-li tèsta.

Era gargolha s'apressèc ara boca dera tuta e entenec eth madeish crit qu'es auti animaus.

- Sò eth monstre guerrèr, eth hilh deth gigant mès fòrt deth mon. D'ua bohada viri eth rinoceròs e damb un escopit dèishi er elefant herit. Sò invencible. Ha, ha, ha, ha!

Mès era gargolha, en torn de húger, s'apressèc un shinhau mès tara boca dera tuta e cridèc:

- Alavetz premanís-te, per'mor que jo òc que sò un monstre. Hèsqui uns sauts coma ua catapulta e pogui sautar enquia dètz viatges mès ensús dera mia pròpria nautada, e ath delà sò limercosa e caci çò que me voi minjar damb era fòrça dera mia lengua.

E entà acaba'c de deishar prèst, se metec a raucar plan fòrt:

- Roac! Roac!

En sénter açò, siguec era eruga qui s'espantèc tanplan e qui se metec a tremolar com ua huelha de tremo.

- E s'aguest monstre que i a ena entrada saute d'aguesta manèra e m'estronhe, o me cueilh damb era sua lengua poderosa e se m'avale?


E atau siguec coma era eruga que jamès non s'arrupís se virèc en ua eruga pauruga. E ei que cuelhec tanta páur que se rendic e, en tot trèir era tèsta pera boca dera tuta, didec:

- Non, se te platz, non me hèsques pas arren, que sonque sò ua eruga petitonha e pauruga.

E en tot qu'era lèbe e era gargolha sautauen e barauen de contentes, toti es animaus valents que s'auien espantat damb aquera eruga tan pòga causa encara corrien en tot húger deth monstre que s'auien fantasiat.

Guarda-me tu qu'auer páur d'ua eruga pichona e pauruga!

*Guion: Jaume Esquiús*



© CCRTV Interactiva, S.A. | Televisió de Catalunya, S.A.

- [Avís legal](#) |
- [Segell de qualitat](#) |
- [Contacta 5480](#) |
- - [Idiomes](#)

- [Català](#)
- [Castellano](#)
- [English](#)